

靖安縣志卷之十五

藝文志 四

賦

明

羣鶴來翔賦

爲况太守作

主事

劉

鉉

長洲人

羣鶴鳴於府治是皆郡守政令之得宜和氣之所感以致然也遂成賦焉或有道公之爲郡也人安歲稔風移俗易汗濁自新橫豪斂迹既弱振而孤存乃弊剗而蠹革退公優游獄訟衰息時當暮春之融和歸自神京之述職奏允敷陳恩多賚錫乃開燕寢乃張瑤席陪從容而來寮佐賀駢闐而集上

客忽有羣鶴其來素空數十其侶三五其同身垂縞素頂露
丹紅喙長兮頸修肉疎兮毛豐影翩躚兮散白日聲嘹唳兮
徹蒼穹將翔集而下降復盤旋而上沖飄飄兮若片雲之出
岫皎皎兮似團雪之迴風客有招而告之者曰爾旣罷衛公
之軒得脫林逋之籠胡不飲瑤池而啄元圃去華亭而返遼
東或遂青田之樂或尋赤壁之蹤或棲嵯峨之島或巢偃蓋
之松出塵寰而遊廣漠跨神仙而赴崆峒乃不顧而之此吾
恐爾逢矰繳而罹罟罟也予曰豈不觀夫易云在陰子和詩
云九臯載鳴皆以誠信之感故無遠而弗應天機觸發妙道
流行顯可以化夫元元幽可以通夫冥冥彼豚魚之有識况

仙鳥之爲靈故其來也蓋以覽其德而知其政薰其和而見
其情有同其昂然而特立矯然而潔清所以翔繞夫黃堂之
上而將下遊夫刺史之庭用彰其心之所格以驗夫人之所
稱是豈智力之可致必也因人而見徵孰謂德無其實而物
徒爲之禎也哉宜夫士庶爭先而快覩父老歌頌而歡騰然
則其爲異也蓋有侔夫穎川鳴鳳中牟馴雉兵曹廳馬之來
孕司徒家猫之相乳實異世而同祥宜繩武而繼美又豈隨
以入蜀者之足比哉復爲之歌曰鶴之來兮千里豈將擇兮
所處旣覽之而得於斯兮宜適乎自如奚必高蹈而遠舉鶴
之去兮海濶天高路漫兮侶寥胡不在陰與九臯彼美人兮

德音孔昭永千載兮同逍遙

喜雨賦

并序

蘇州府 韓 陽
訓導

宣德癸丑歲揚州之域三吳之分旱魃爲虐雨澤愆時自春
三月至秋七月不雨或有雨焉俄頃卽止田疇龜坼禾苗焦
稿民心彷徨憂苦無訴蘇郡太守靖安况公伯律憂民之憂
閔民之苦盱食宵衣不遑寧處遂齋沐虔誠遍謁境內祀典
諸神宇訟過責失歸咎於躬詞意懇切有足感動神者秋七
月五日天油然作雲沛然下雨焦者旣沃稿者復甦逮乎十
有二日雨復如注黎庶忻然咸舉首加額曰此雨乃吾太守
憂民之心格於天心冥冥之中感而降之以雨民聲歸惠於

太守者萬口如一陽觀聞其事喜不容默乃不揣蕪陋敬作
喜雨賦以美之

其辭曰粵惟肇自春分至於大暑踰此二時亢暘無雨何旱
魃之興妖致農民之罹苦秧始栽而涸河苗將秀而焦土瞻
石燕兮不飛視商羊兮不舞卜池蛙以無聲聽林鳩而無語
雲乍布而復收雨纔滴而卽阻民磬磬兮靡寧天蒼蒼兮無
訴若郊若坳如焚如蒸焦禾殺稼可畏可驚惟我廉明之賢
守司重寄之專城閔黔黎之多苦傷秋穫之無成矧姑蘇爲
東南之甲郡而租賦爲天下之首稱念上供之曷給矜下稅
之何徵因忘餐而廢寢乃焦思以勞形於是反躬自咎致敬

盡誠潔齋壇墀祈叩神靈身奔暴於炎赫心懇切於黎氓惟
誠意之孚感信天道之昭明赤日千里濃雲四興電車走耀
雷鼓振聲風飄飄兮漸起雨紛紛兮忽零始霏微而若灑終
滂沛而如傾其滋也可以回山林之稿卉其潤也可以起田
野之枯莖無巨細之不被無高低之不平田疇霑足而焦禾
復實河渠充滿而膠舟復行致霖雨於亢旱變凶歲爲豐登
由是老穉騰歡士農胥慶或謂雨澤霑濡之功實爲賢守精
誠之應人人動忻躍而可觀處處興歌謠而可聽援以召父
而莫方證之杜母而難並噫是雨也通冥達幽良有其由上
焉而君臨大寶有唐堯虞舜之聖下焉而參贊廊廟有臯夔

稷契之儔又若撫巡南國者周召之匹分理列郡者龔黃之
流以故仁風播於四海化雨洽於九州固羞熙寧之蝟虎亦
哂廣粵之泥牛嗟小子其何知沐聖朝之膏澤忝泮水之儒
官慚涓埃之無益逢久旱之甘霖感天人之交格雖臥病於
閒齋亦忻忻而悅懌敷志直之微辭美我公之偉績嗟長河
之涸鱗願餘潤之一滴乘滂沛之清波頌天恩於上國

國朝

雙溪攬勝賦

高克藩

江都故地厭原西陞曰靖曰安卜邑於茲昔隸建昌蔚矣海
昏之村落今屬淇郡叶于奉武之墳笮地不介乎中遠舟車

寥聞秀特鍾於巖邑城郭參差升高而望歟山環峙雲深繡
谷縹緲吳憇山頭花簇桃源掩映子虛宅里訪葛仙之丹井
藥竈依然尋謔母之芳蹤苔痕宛爾文筆聳而火焰斜迤邐
挺特儼若龍跳虎蹲狐尾夷而石門峻盤曲蜿蜒不啻蛟騰
鳳起登山已駭其耳目臨水更眩於睹聞或自南源而發蒙
滙馬湖以潺湲或自忠夏以屈注赴桐城而怒奔礫洞藕潭
絲彈竹奏青旗黃富雷吼雪翻遮城闕而委蛇光搖南浦之
月過津橋而澎湃波驚石馬之村允矣水秀山明展也地靈
人傑振古已然于今猶烈其小人樂耕耘芟嶺月鋤隴雲貧
生于瘠善生於勤其婦女嫻機杼饑不餐寒不絮爲絺爲綌

載寒載暑至於膠庠之彥衣冠之流詩書晨夕絃誦優游不
靡而璞藏器待售爾乃佳辰良夜娛物賞心則有春朝賽社
士女如林填街塞巷撾鼓鳴金童男歌舞亭閣浮沉艷陽之
天增勝金吾之夜不禁又如榴火方紅艾旗正綠綵舟熠燿
畫橈馳逐與波兮上下擊楫兮斷續奠蒲觴兮弔屈子投角
黍兮宜蛟伏中流鼉鼓逢逢傍岸人聲簇簇雖寂寥羈愁之
夫莫不蕩心而搖目若夫蟾光滿戶皓魄連宵一樽狼籍竟
夕叟號秋風重九結伴登高帽檐欹側醉眼醜醜興與林泉
會氣隨景物豪一時之寄託千古之風標吁嗟乎山川如故
人物已非往者莫諫來者可追溯商老之高風祇留釣亭烟

兩問參軍之遺事僅餘峯影魚池李尚書之才藻何存但見東江春草綠况刺史之政績安在惟聞西嶺夜猿啼子固文章不朽清華鐫碣淡軒德澤在人幽谷留題後之視今亦猶今之視昔所賴植品端方秉心淵塞體用具備進退不忒或黼黻于廊廟或輝煌于泉石絕佛老之邪說挽末流之陷溺是謂以人而重地庶幾風移而俗易彼大寂與稚川人口且至今其嘖嘖豈宇宙之完人而雙溪不增其物色試弔古而鏡今尚永懷于無斃

石船賦

舒 銑

維茲船之瑰異兮匪人力之所營殆造物之靡測兮特獻奇

于無窮置縹緲之峯頭兮泛積氣之溟濛俯羣山之層疊兮若翠浪之排空任歟流之日下兮肯隨之而其東爾其清秋雨霽明月滿山銀河夜見瀉影其間儼一槎之浮星渚豈剡溪之棹初還又如長松夾嶺沖飈大作濤聲驟起震撼谿壑疑山形之欲動似危島之難泊若夫霜零草枯野燒蔓延如燎鴻毛烈焰侵天則周郎之攻魏軍於赤壁而戰艦之生烟時或雉蛇化蛟出于其側雷電交加澗水上逆則陽侯蕩子羽之寶舟而肆威以相逼其艚之列石也如鼓之震如星之墜如外國之帆至而貢異物于京邸是孰使之然哉則造物之奇也聞之匡廬有峯名曰鐵船吳許所駕遺石昭然夏后

之世募力如虎陸地行舟自古莫有然則茲船也果神仙之
示幻而募力之所推移歟吾烏乎測之則信乎造物之奇也
蓋嘗思夫天地之間一積氣耳氤氳萬狀皆其所爲人據跡
而分別乃執類以相稽謂山之不同于水石之不可爲船而
因以相疑也夫孰知春夏秋冬之遞閱非卽川流之奔馳飛
鳥走獸之出沒非卽遊魚之自如樹木之參差非卽其荇葦
而天地之寥廓非卽其岸際而胡若是之膠膠爲且夫茲勝
也仙姑後擁羅漢旁持仙姑羅漢皆山名偶焉至此塵襟盡滌心曠
神怡非大地之皆苦海而是固其慈航以渡世之癡迷歟余
將以白雲爲帆以高峯爲桅乘彼石船徜徉無極而又何傷

乎具濟世之體質而莫之或知也哉

廬山賦

舒 洛

維匡廬之奇秀兮獨傑出于大江之西山與水而相涵兮水
與山而相維懸翠壁之萬仞兮而故顯其孤危瞰波濤之萬
頃兮而一任其奔匯包彭蠡于懷中兮灌洞庭于足底據金
陵之上遊兮而俯視中原鎮荆楚之下流兮而遙窺吳地斯
則其勢之異也若夫五老蒼頭于天半疑同千古之碩望雙
鋤耀鋒于江州驚猶射斗之利器上霄峯紫霄峯爭爲雄長
大漢陽小漢陽各別尊卑並森森而不散亦簇簇而相依脈
連衡岳恍乎先後之崔嵬而遙誇子孫之奇障名天子儼平

左右之羅列而殊有君臣之儀斯則其形之異也至于泉流
三疊滾雪毯于雲中春放萬花鋪錦繡于谷裏文殊閣畔佛
燈千點燦星光竹影寺中虛壑空中傳梵語捨身崖寒學士
之膽鐵船嶺幻仙人之跡探之難名思之靡測而未有窮極
又想夫風生林杪松聲與濤聲相亂雪滿峯頭山光與水光
相配時或雨後訝瀑布之千條時或霧開出奇峯于不意渾
身巨石嶙峋正側遙看怪偉斯豈米顛之所能籠于袖中老
蘇之所可托于盆內斯則其景之異也乃如蓮社名高笑慧
遠于虎溪栗里風清眠淵明于醉石鳥窠棲樹杪樂天隱跡
于深山鹿洞有書聲李渤開基于勝地是皆往昔之名賢與

茲山而無媿迄夫濂溪闡性天之奧傳鄒孟不傳之陸緒者
亭總南康之軍發先聖欲發之遺誨因而學者數千羣聚
斯廬山門戶峻象山亦復來朝鄱湖教澤寬鷺湖亦俱來會
先朝代有碑銘近世尤加崇異青山生色藻章光映丹霞書
院流芳道學風同宇內斯則其人之異也雖白雲深處老僧
之所占恒多瑤草坡中羽流之所據不少而亦猶夫鳥獸草
木寶藏之產于茲山者不可勝數祇以形山之廣大而山寧
借彼以稱奇也哉惟是禹篆秘層崖誰探洪荒文字匡生隱
深山莫識雲廬舊址徒令人想像而已蓋嘗思夫天下之山
非一而山難兼水水不兼山故五岳爲尊匡廬爲奇誠以其

傑出于大江之西大山大水相得而著美者也俗士身在山中而全體莫窺吾輩置身天外與天爲徒然後嘆茲山之巨觀而天地之文章莫大于是也是豈尋幽耽僻之徒所能得其勝致于萬一者耶聊賦俚言用傳勝致廬山有靈或不我鄙

挂屨楓賦

熊銓

鬱峨峨其雄峙兮步玉隆之神宮蒼山合而繡錯兮浮野色于空濛余盤桓而弗去兮緬旌陽之奇功指丹鼎以求餌兮玩雲車以從容塞靈旗以搖曳兮瞻神劍之矐矐嘆靈修之遠逝兮予悵悵其何從乃徘徊而延佇兮忽移眺于丹楓枝

突兀而離披兮猶森森其慈龍燦斑爛之古色兮噓肅肅之靈風父老告予以舊聞兮曰仙令之遺蹤繫惟憫此南州公鄰蛟穴以自危勢蜿蜒而欲張兮厲純鉤以窮追忽星流而電逝兮陟山巔與水湄旣徧索而未獲兮憇繁陰以凝思悼長征之已倦兮束芒屨于瓊枝託靈爽之默護兮俾根潤而葉滋胡干祀而不彫兮乃偃仰其在斯余聞而深爲太息兮慮傳聞之猶誣意仙人之飄飄兮御一氣于虛無驅鶴馭以前征兮鞭風馬以長徂若青城之騎杖兮若王喬之飛鳧若盧耽之脫屣于白鵝兮若鮑君之幻履于燕雛夫何躡此芒屨兮猶蹙蹙于塵途將超舉以有待兮聊微行以逐逋抑變

化使不可知兮故與俗而無殊何芒屨之不朽兮樹亭亭而未枯殆仙蹤之偶憩兮留勝跡于南都瞻東山之檜柏兮將異壤以同符憶古人幾瞻望兮今予猶憶此蒼蒼彼闕人等蜉蝣兮孰久駐以徜徉盤屹屹而永固兮獨高寄于大荒吸雲表之甘露兮隨薰風之寂颺斂精氣于寒泉兮染丹華于清霜歲不改其恒度兮歷萬古以爲常洵神明之過化兮被草木以餘光邀斯人之不可見兮悵瑤島之茫茫望古榦之扶疎兮撫遺跡而徬徨何隻履其莫留兮寧往躡乎西方余惟眷此丹楓兮應媿迹乎甘棠匪惟物而惟人兮戒翦伐以勿忘

東湖賦

舒慕芬

西峙西山南潯南浦豫章名勝未易悉數遵彼城隅爰有東湖汪洋數畝秀絕而孤沙長水明沈鷗浴鳧青蒲照人綠波平鋪若乃繞湖之隄林壑相次屈曲環抱天然位置湖之中央有洲特異名曰百花與湖爭媚爾其芳洲選勝幽致何窮幾疑海藏或訝龍宮恍瓊樓與玉宇疑蓬島與崆峒旣石磴之險仄兮復雲崖之玲瓏豈天造而地設兮極鬼斧而神工鑱危橋于荒烟兮乃宛轉而渡虹峙高臺于秋水兮若笑兀而凌空他如士女嬉遊沿湖行樂或聽鷗兮茂林或數魚兮淺壑或放艇兮狎鷗或攜琴兮載鶴或垂釣兮柳陰或敲枰

兮蘭若或聽鐘樓兮而逸韻悠揚或瞻棘院兮而文光閃爍
或陟湖亭兮而賦詩慷慨或坐湖石兮而揮觥灑落或漁笛
棹歌之四起兮同松濤竹浪之交作至于深情遠寄歷覽湖
邊登孺子之亭兮而曠懷高士拜澹臺之墓兮而憑弔先賢
望物華之樓兮而寒烟漠漠眺雲卿之圃兮而芳草芊芊嗟
古人之不見兮徒悵望而悄然但聽湖水之嗚咽兮對湖光
之淪漣

洪崖賦

用謝莊遊陰騰鶴嶺
飛清起鳳池爲韻

舒慕芬

惟茲崖之特異洵羣山之莫京旣丹峯之卓笏復翠嶂之舒
屏隱神仙之窟宅會泉石之精英伏龍之號輿圖夙志洞天

之勝道書素稱左寺翠巖斯宗風之丕振右宮應聖多古蹟
之難名或千崖兮競秀或萬壑兮爭流倘飛仙之不挾兮曷
以遨而以遊或寒巖兮鈞隱或幽澗兮龍吟時蒼翠之欲滴
兮乃白雲之翳陰或芝房兮露濕或石室兮雲蒸惟土膏之
下潤兮自嵐氣之上騰又或化人兮往來或仙侶兮托足或
時驟乎赤螭兮或時駕乎黃鵠又或雨漱兮風搖或雪霽兮
霧醒飄素練之千尺兮挂晶簾于絕嶺或峯頭兮鶴唳或樹
底兮猿歸雲出岫以何意兮鳥知還而倦飛或松風兮送響
或山月兮獨明或春景之和融兮或秋氣之淒清或採藥兮
鋤雲或尋真兮涉水或樵歌之上下兮或牧笛之四起或琪

花兮滿巖或瑤草兮繞洞或弄簫于天際兮下雲中之鸞鳳
或怒濤兮雷吼或激水兮雲垂疑癡龍之鬪峽兮滙奔泉而
成池乃若遙稽仙跡烟鎖雲環探石壁之古篆兮而點畫剝
蝕難剔蘇而洗斑望鍊藥之石臼兮而林花紅綻儼羽客之
燒丹靚清冽之丹井兮而寒泉迸出仍雪浪之潺潺陟拍笑
之孤亭兮而怪石磊落猶彷彿當日之撫背而怡顏爰作招
仙之歌曰洪崖棲隱兮雲水堆洪崖仙去兮猿鶴悲崖松拏
攫兮覆石基崖泉芳潔兮洗俗脾洪崖洪崖兮何時騎雪精
而來歸

桃源賦

項方鳴

粵雙溪之佳麗兮得桃源而賦之山翠崿而聳秀石裕研而
呈奇水潺湲而屈折洞玲瓏而幽微蒼松翠竹古柏虬枝或
在巘而隱白雲或在路而引紫蘂春蘭秋菊瑤草元芝或采
佩于南阡或寄賞于東籬撫啼鳥之變聲聆呦鹿而興思尋
異香于流水數帆影于漁師挂鶴嶺之晴嵐降瑤壇之仙妃
訝山水之靈異恍武陵其未迷旣景貺之盤鬱隱高士于西
陲脊虛劉子見于唐時孝弟名鄉文學能詩厥後君實別號
支離摘文立品有守有爲愛林泉之峻潔樂風俗之淳熙男
耕女織晚爨朝炊皞皞乎綠蓑烟雨遲遲乎春日黃鸝鳳歷
新頒不必記甲子于花開落蝸廬托處何須論跬步之路險

夷別有天地兮非淵明之幻語漸入佳境兮乃騷雅之品題
洞不必尋而自見津不必問而可知彼避世者欲再覓而不
得此忘世者實徜徉其相隨餐霞煮雪飲水樂饑慨高風殊
未遠緬彼美于中坻

靖安縣志卷之十六

雜志

天地五行之氣有正則有閏文章著作之規有正則有
雜閏者所以歸其奇雜者所以補其餘易之雜卦禮之
雜記固其義也雜志亦然蓋一邑之事繁而不勝紀矣
舉其大者各列爲專門外此如災祥兵燹以及流寓仙
釋叢談逸事之流杳然無所比屬附則贅畧則疏彙錄
之以別爲一編信以傳信疑以傳疑亦輯亡補軼不廢
參稽之意歟

祥異

一邑災祥詎必遂關洪範然令之政教或於此可徵
休咎焉史稱麥秀雨歧蝗不入境非循良之明效歟

宋

元豐六年洪州七縣稻已獲再生皆實宋史五行志

紹興二十七年洪州大水宋史五行志

乾道三年江西諸郡水隆興四縣為甚 四年夏六月隆興

早 七年洪州旱 八年隆興府薦饑俱宋史五行志

淳熙七年隆興大旱宋史五行志 九年秋七月隆興旱豫章書

十四年夏隆興旱豫章書 十五年六月隆興府大水宋史五行志

志

紹興四年六月戊戌靖安縣水漂三百二十餘家宋史五行志

嘉泰四年春隆興府大饑宋史五行志

嘉定八年春旱首種不入豫章書

端平元年夏六月大風雷屋瓦皆飛鳥獸驚駭通志

案舊志載宋紹興淳熙嘉泰嘉定間皆大饑端平元年

風雷變故為考證

元

至正四年春正月隆興靖安縣雨水冰 九年靖安山石溢

裂湧水人多死者俱元史五行志

明

永樂十三年夏四月南昌府屬大雨壞廬舍沒禾稼府志

洪熙元年夏四五月南昌府屬久雨水潦傷稼府志

宣德八年夏六月南昌府屬大雨淹沒田畝府志

正統五年春夏南昌府屬淫雨淹沒早禾 十二年南昌府

屬水災人民乏食俱游志

景泰七年夏四月南昌府屬淫雨自五月至秋七月旱傷禾

稼府志

天順二年南昌府屬久雨大水衝決民居淹斃禾稼府志

成化元年南昌府屬旱府志 二年旱舊志 三年南昌府

屬自夏四月不雨至六月禾盡枯府志 十四年旱舊志

十五年春旱五月又大水舊志

宏治十四年大水 十六年南昌府屬水府志

正德元年大旱 五年民大饑遂起為盜有瑪瑙崖之變

六年三月日抱環珥白虹貫之 八年大旱 九年八月

朔日食晝晦星見咫尺不見人禽鳥投林踰時乃見 十

三年大旱六月有星自東南方向西北其光燭天有聲

十四年大旱俱舊志

嘉靖五年六月大旱 十九年五月大饑斗米銀壹錢 二

十二年雨雹如栗杏大 二十三年旱 二十四年饑斗

米銀壹錢知縣史載澤設法賑濟 夏五月泮池開蓮花

並蒂俱舊志 三十九年春三月南昌府屬水饑靖安尤甚

府志

四十年二月大饑山蕨採盡間有鋸棕屑度活者
主簿黃應徵設法賑濟 四十一年夏五月大水衝決民

居田產

俱舊志

案斗米銀壹錢似不為饑想見當時米價之賤

萬曆十六年歲饑

舊志

崇禎九年大水歲饑

舊志

國朝

順治三年大旱五月不雨次年大饑斗米銀七錢

舊志

十

年益田都壽民陳舜禹百歲眼見孫曾巡撫蔡士英給人

瑞額旌之

舊志誤為明人附於選舉未據文冊更正

十年大雨雹

舊志

康熙九年大水 十年旱 二十年夏陂都壽民張希文百

歲知縣鍾芝豫給扁旌之 二十四年多虎傷人六百餘

二十八早 二十九年大雨山水漲發漂沒沿河廬

舍 五十四年六月大雨水衝決縣城西門外馬家洲淹

沒昭靈祠前田地百餘畝邑紳涂玠捐築隄岸捍之未幾

仍潰決

俱舊志

雍正五年多虎傷人 七年四月初六大雨雹傷禾稼

俱舊志

乾隆二年歲大有 七年秋分後衆木華 八年歲饑

府志

斗米銀貳錢伍分民食禹餘糧 十一年六月縣丞署內

桃李華 十六年五月歲饑斗米銀叁錢署縣朱堂碾常

平倉穀平糶俱舊志二十一年歲饑二十五年旱三

十二年夏南河大水三十五年棠棣都漆能五妻李氏

壽百歲知縣楊瑄詳請題

旌給扁四十一年六月不雨歲饑府志五十八年七月

朔南北兩河大水衝塌田廬秋稼無收巡撫陳淮親臨勸

災

嘉慶七年夏大旱民食觀音土十年五月大水知縣馬廷

燮捐俸撫卹十三年閏五月大水十八年廂都耆民

錢顯輝年七十二歲五世同堂知縣馬廷燮詳請題

旌給扁二十三年雨雹二十四年南源都壽婦劉廣場

妻易氏年九十一歲五世同堂代理知縣楊鳴謙詳請題

旌給扁二十五年自五月下旬至八月不雨秋稼歉收

道光元年夏六月雨雹

武事

靖邑桃花源也自來罕見兵革事惟土寇間有竊發尋亦燔蕭灼艾自干刑戮焉耳就各志備為搜輯以諗保障斯邑者

宋

景定元年元兵入境縣尉羅夢械巷戰死之通志

元

至正十二年紅巾寇入境達魯花赤潮海與縣尹黃紹及邑

紳舒慶遠塗淵胡斗元謀拒敵黃雲戰死潮海黃紹皆死
之舊志

至正十四年賊兵復至達魯花赤民安圖迎戰死之新補

至正二十二年春正月明兵取隆興路寧州土豪陳龍以分
寧奉新靖安武寧降豫章書

明

正德五年江西盜起賊首胡雪二結寨華林及瑪瑙崖劫掠
靖安副使周憲督兵親討遇害其子幹亦死之南昌府知
府李承勛勦平增訂舊志

案周副使本傳云死於華林寨此據支大綸忠烈祠記

謂在靖安遇害

正德十四年宸濠造逆餘黨凌十一閔念四百餘人逃至靖

安屯聚寶峯弩崖山知縣萬士賢勦治追至安義就禽舊志

隆慶二年寧州賊渠李大鑿楊青山倡亂巡撫潘季馴遣守

備鄧子龍討之置營靖安雙坑哨通志

崇禎十五年奉新視下李肅十肅七謀逆邑人劉丁九捕之
被殺遂嘯聚為紅巾賊推官胡時亨督率鄉勇力戰殺賊
首李東陽等數百人衆皆就撫舊志

案彭搏鳧鳴雜錄崇禎癸未四月司李胡時亨以監軍
來奉新會靖安請分鎮遂居靖靖去賊營甚近得便宜

從事招塘港白兔潦原二千人梟勇異常乃合三縣同日進剿賊大敗將官金國柱張獻表追入乾洲寨燬殺無算賊皆奔逃國柱遂禽二賊以歸時兩縣議撫事成鄉勇與義士帥益寰諸人不從賴時亨多方調攝剿撫並用六月餘收拾殆盡持節班師然則胡司李之大有造於靖與吳副使一貫李知府承勛同而府志本傳竟漏載此事惟奉新志頗詳特附識之後之修祀典者當爲之請入名宦也

國朝

順治元年十一月武寧縣昇仁鄉土賊劉照華糾聚柯賊寇

靖安磔坑都鄉勇邀擊賊潰首就撫斬之

武寧縣志

順治三年春二月瑞武大盜由靖安至龍頭坎

奉新縣志

順治五年金聲桓王得仁據南昌反授武寧守備鄧雲龍僞劄爲都督是年鄧寇攻陷靖安次年踞寧州大將軍譚泰降其衆以雲龍歸

順治十六年三月盧洪十倡亂華坊坪聚黨千餘行劫村市知縣屠尚參將張允重領兵進剿賊逃入深山渠魁就殲閱月周家埠潛良四入城刺殺典史時傑九月逃賊復擁衆突至適霜降操兵防守千總李得功迎敵力戰尋卽剿獲

舊志

案時傑死賊與李得功破賊詢之故老非一時事高志
誤并爲一茲攷正 原跋

康熙十三年吳耿背叛駐防把總陳德明陰結奸民劉往七
張采七合黨二百餘人據城反旋散去十四年八月及十
五年三月兩次攻城知縣林鍾守備徐朝試防守千總李
芳力拒却之隨散隨聚生員趙璧涂芳奉委招撫賊衆投
誠 舊志

案林鍾時已由豐城縣丞陞靖安知縣舊志尚載原官
茲爲更正

又案武寧縣志是年江西總兵官楊富謀反事覺被誅
餘黨竄靖安以白布裹頭曰白頭兵又南康府志是年
冬寧武奉靖盜首劉往七戴明曉等攻陷建昌蹂躪安
義又奉新縣志十四年春新昌賊與寧州靖安賊合焚
劫無虛日蓋其時各境騷然至十六年
大兵勦撫乃始悉平

寓賢

邑僻在偏隅輪蹄罕至稱寓公者蓋鮮舊僅有金處
士今檢閱載籍并訪之故老復得四人用志高賢之
遺蹟其不附於人物而列於雜志者示不敢借材異
地也

明

李邦華字孟闇吉水人少隨其父廷諫館於邑迴溪上元令

陳文家與文四子共硯席者十數年廷諫舉萬厯癸卯鄉
科游宦京師乃始挈之去後邦華巡撫天津有寄壽陳應
慶序猶戀戀靖安山水稱爲樂土焉以左都御史死節文
信國祠謚忠肅

徐世溥字巨源新建人明季諸生累辭薦辟負盛名於時所
稱南州四公子之一也嘗避兵走靖安訪故人舒管生於
浚天閣寓居鼻芳山中最久與舒初民鄭延祖輩俱友善
其哭初民有流寓客中客亂離身後身之句才人境窄蓋
可悲矣世溥雖極流離不廢嘯歌以山水友朋爲性命吟
屐所至雲壑留香凡在靖題贈詩文見於榆墩集及雨裨

新漚者猶想見寓公風流云

徐應芬字二其進賢人學問博通中崇禎庚午乙榜後因世
亂隱居靖安之寶峯山著書自娛有聾山子全集

進賢縣志

國朝

喻昌字嘉言新建人明季副貢學博才宏隱於醫其女兄嫁
邑之舒氏故居靖安最久治療多奇中戶外之屨常滿焉
後僑寓吳中卒無嗣其甥負遺骸歸舟過左蠡遭風浪首
尾盡折獨骸龕一棺無恙厝於邑中一蕭寺有盜其旁銅
環者立斃法身久而不壞郡人迎歸祠之所著醫書遺稿
多藏於其甥家甥族人斯景補刻其傷寒後論熊進士銓

爲序而行之

金孟庚別號石庵江南休寧人順治間隨父行生來靖安卜居南源華家山父沒命其弟歸娶獨奉祖母遺像廬守父墓不求聞達六十餘年如一日教授生徒以孝友相勸勉薰其德而善良者甚衆邑中耆舊皆樂與往還年踰九十而終康熙壬辰捐田租三十石入學宮爲購書之資孝義之行賢愚推服

舊志

仙釋

神仙荒渺儒者難言靖自宋以前人物多無可考惟羽客緇流其軼乃時時見他說豈真山水奇奧足爲異人窟宅與然如馬祖之大倡宗風善權之得傳詩派其名又烏可佚哉

三國

葛仙卽稚川楚人漢末隱於益田山中草衣木食逍遙物外建昌都尉太史慈追盜至此與葛遇知其非常人與之共飲食問以休咎握拳不語而去人知而跡之虎豹環其側不可近矣

舊志

案安志云葛生不知何許人隱於新吳山豫章記云靖安有葛仙山仙本楚人漢末隱此或云卽葛洪山有洪煉丹壇飲馬池舊志蓋本於此然考之真仙通鑑葛元以吳赤烏七年上昇太平御覽太平寰宇記俱載弋陽葛山有葛元塚江右多其修煉遺跡此事在吳桓王時

或卽爲葛元歟洪則元之從孫也

晉

劉懿真晉女冠也東晉時已五六百歲治長生術常誦黃庭大洞經修煉於棲霞觀顏如童子遊謔母嶺得仙術復歸觀歲餘忽聞空中鼓樂嘹唳飛昇而去丹井寒泉猶存遺

蹟舊志

案安志建壇葛陽山之麓後白日冲舉今靖安有劉仙觀真仙通鑑劉仙姑名懿真靖安人年數百歲貌若童子謔母嘗稱之真君往見則已飛昇矣遂留寶木華車遺之車因風飄舉三日而下因名其觀曰華車碑碣猶

在今號棲霞觀又考通志棲霞觀於宋治平間始改名則竟謂懿真修煉於棲霞觀未免小誤

甘戰字伯武許旌陽弟子十真人之一陳太建元年正月七

日飛昇

真仙通鑑

舊志作

靖安縣西北丹仙觀爲戰故

宅豐城縣南白鶴觀是戰得道飛昇處

名勝志

案此則真仙通鑑謂戰爲豐城人誤矣

唐

李元基唐武德中隱葛山有道術能坐在立七人莫之測時經行以符藥救人探虎骨針鵲影活魚鱉甚衆夜露宿草野中代宗末插松柏滿身飛去後有人探藥葛山中見

元基跨青鹿其行若飛問之不應莫知所之

舊志

案此傳皆真仙通鑑原文惟於代宗末下摘去在建昌縣中五字時靖安正屬建昌縣也

文蕭虔州人唐太和中應舉不第回至洪州遊葛仙壇忽遇仙女吳彩鸞同至盆田見其山水秀麗遂於此修真白晝跨虎而去鄉人立祠祀之有禱輒應名文吳二仙宮

舊志

案豫章書吳彩鸞傳及裴硯傳奇皆未言其至盆田山惟明一統志載有留丹奉新藥王山之事兩境相距不遠或曾一駐仙蹤究之此事杳茫虞伯生寫韻軒記已辨之詳矣

道一漢州什邡人姓馬氏故稱馬祖得法於南嶽懷讓

讓得法於

曹溪六祖

自建陽佛跡嶺遷臨川次至南康龔公山大厯四年

開道場於鍾陵開元寺洪州廉使問曰啐酒肉是不啐酒肉是答曰若啐是中丞祿不啐是中丞福龐居士蘊嘗參道一曰不與萬法爲侶者是甚麼人道一曰待汝一口吸

盡西江水卽向汝道居士大悟遂廁門徒焉貞元四年二月一日沐浴跣趺而逝元和二年賜號大寂禪師塔曰大

莊嚴之塔

景德傳燈錄

懷讓參六祖祖曰西天二十七祖波若

多羅識汝足下出一馬駒踏殺天下人蓋指馬祖也

釋氏稽古

錄先是師嘗經由建昌泐潭之石門愛其山水奇勝洞壑

平坦顧謂徒曰吾朽質之日歸骨於此至是門弟子奉靈骨舍利藏於石門寶峯院相國權德輿爲之碑得法弟子凡一百三十九人各爲一方宗主轉化無窮禪宗至此大盛於世

佛祖通載

國朝雍正十三年

加封普照大寂禪師致祭一次

舊志

案佛祖通載一則與權文公馬祖塔銘所云吻合

常興住靖安泐潭寺南泉至見師面壁泉乃拊師背師問曰汝是阿誰曰普願師曰如何曰也尋師師曰汝何多事師爲六祖下第三世

指月錄

法會六祖下第三世嗣馬祖住靖安石門泐潭寺問馬祖如何是祖師西來意馬祖終不言法會默悟繞法堂一匝而

去

指月錄

惟建六祖下第三世嗣馬祖住泐潭師一日在法堂後坐馬祖見乃吹師耳兩吹師起見是祖卻復入坐祖歸方丈侍者持一盃茶與師師不顧便乃歸堂

景德傳燈錄

道虔福州侯官人姓劉氏受石霜印記化徒於九峯後住泐

潭而終諡大覺禪師塔曰圓寂

景德傳燈錄

水滌和尚不知其閭里族姓天寶中始至洪之石門見諸峯蜿蜒若龍蟠者愛而築室居之後馬祖自豫章來泐潭師

往拜之問佛法大意祖踢之仆地師忽大悟起笑曰也大
奇百千三昧無量妙義祇向一毛頭上識根源去住語具
見傳燈錄自是學徒雲集易庵為毘盧院

釋大訢毘盧院記

宋

懷澄南嶽下嗣五祖戒住泐潭

石門山志

黃龍南初依泐潭澄禪

師分座接物名振諸方

普燈錄

曉月原字竺卿明教契嵩禪師為易字公晦得法於瑯琊覺

住泐潭一十五年勅殿前雙閣契嵩為之記

石門山志

常總劔州尤谿施氏子初至禾山依禪智才公聞南禪師之
道依歸宗歸宗火南公遷石門又遷黃蘗積翠以至黃龍

總皆從焉密受大法叢林宗之洪州大守榮公修撰請住
泐潭其徒相謂曰馬祖再來也元豐三年詔住東林賜號

照覺禪師

佛祖通載

克文陝府鄭氏子嗣黃龍南詔住建康報寧寺賜號真淨禪

師崇寧元年趺坐而逝舍利分葬泐潭新豐

碑記本傳

雲庵宋

真淨文禪師退居之所覺範所謂曾學雲庵逸格禪者是
也塔在寶蓮峯下覺範又有十年不掃先師塔聞有雙桐

護石根之句

石門山志

文準字湛堂興元府梁氏子初謁真淨文淨曰近離甚處師
曰大仰淨曰夏在甚處曰大滄淨曰甚處人師曰興元府

淨曰我手何似佛手師罔措淨曰一切現成更教誰會師
當下釋然服勤十載所往必隨紹聖三年隨真淨移石門
顯謨李公守豫章請開法雲巖未幾殿中監范公帥南昌
請居泐潭政和五年示寂得舍利塔於南山之陽石門妙山志
喜杲禪師趨寶峯謁湛堂準湛堂見杲風神超邁特加器
重使之執侍指以入道捷徑與李彭商老同參妙諦湛堂
入寂杲重趺荆渚謁無盡居士張商英請銘佛祖通載
案李商老南康人列江西詩派圖石門山志謂是邑人
政和八年進士官至郡守是即呂延年矣然呂令蕪春
非郡守也殊誤

德洪字覺範初名惠洪姓俞氏高安人通志云新昌彭氏子少孤受學

能緝文年十三出家依三峯禪師十九試經東都落髮受

具聽宣秘律師講華嚴經歸事真淨克文七年盡得其道

佛祖通載淨遷石門師隨至所著有石門文字禪註等書石門山志

案覺範石門詩集有由雙林至寶峯寺五古一首其祭

雲庵和尚有云紫霄之下泐水之湄前後七年雲起龍

隨是覺範居泐潭亦久矣

福深嗣法真淨文禪師造天書閣於祖殿後承閣之下名曰

選佛堂張商英爲之記石門山志

景祥南城傅氏子師每叉手夜坐如對大賓初坐手與趺綴

至五鼓必齊膺因號祥义手塔在寺西塔坑石門山志

案通志景祥住浮山示寂無藏塔泐潭事然其為寶峯

住持則見於洪邁夷堅志中

又案寶峯名利自馬祖後住持茲山者類多名德尊宿

茲就石門山志所輯參之傳燈錄五燈會元擇其最著

者登之他如闡提惟照泐潭印乾尚不及載亦可見叢

林之盛矣

善權字異中邑人姓高習禪定住雙林寺能詩與東溪賴可

叟齊名徐俯跋其詩軸云異中下筆豪俊峻嶒余每誦之

輒能興起蓋得李北海字外出骨中藏稜之意有真隱集

黃庭堅為之序後舒邦佐復序之以傳世呂居仁敘江西

詩派圖二十五人權居其一

案舊志詩跋作東坡語茲據舒平叔序定為徐師川

國朝

僧光臨不知何許人縣北石霞村有迎禧觀舊為道院雍正

年間有二僧攜一徒居此徒即光臨也後遂為是觀住持

平居不冠履飲食取其最惡者見客食器有餘粒必掇取

噉之竟夕坐蒲團不寐人謂其癡奉新三元觀鄉道人病

顛久矣與光臨數往還乾隆二年正月十一日冒雨至縣

市觀鄉人賽社暮回觀中語達旦不休次日同捨身揚鶴

坪之天香崖鄉人蹤跡得之僧跣坐半崖石上道人仰臥
草中鼻上舉體完好如生

熊銓僧光
臨傳畧

古蹟

古賢遺跡足資憑弔亦觀感之一
端也其已見於山川者不復贅述

深柳讀書堂在棠棣都桃源山唐校書郎劉昫虛讀書處

舊志

釣亭在縣東五里東江都烏石里邑進士呂延年令靳春歸

築亭先塋之側日把釣其間名曰釣亭

舊志

案名勝志誤作呂延平張叔夜寄題有詩玩其詩意呂
商老時尚未遇卽已築有此亭否則張殉節已在靖康
北狩時呂歸田在紹興後張何由題咏其亭耶舊志蓋

襲名勝志之誤未及細考耳

雙峯堂在縣北宋淳熙間邑人舒邦佐第進士歸築此堂以

見志自爲記

舊志

天澤池在縣治後宋舒邦佐所鑿池邊建望烟樓面池卽雙

峯堂今子孫世居於此

舊志

放生池在縣治南積慶坊一云在縣廡之北相傳舒邦佐致

仕歸嘗放生於此

舊志

製錦堂在縣署內宋紹興中邑令黃宗諤建元燬於兵明知

縣衡守敬改爲驛館後又爲主簿廡

舊志

百花亭宋縣令黃宗諤建在廳事後

名勝志

幽谷亭宋縣令黃宗諤建與縣北幽谷山相對僧權槩寄邑
令詩差我幽谷亭寂寞彭澤令絕景空自奇高標岌相映
名勝志

案舊志幽谷亭崇寧中知縣謝宇建而於建置官署內
又作黃宗諤前後互異茲據名勝志改正至權槩一詩
舊志作巽中繡谷山作與此小有異同見藝文

水木清華亭宋楊億知靖安縣治尉圃得舊詩碑於榛莽間
皆前代名士所作乃用曾南豐詩正在清華間句作水木

清華亭於縣治中 名勝志

案名勝志誤以楊億即楊文公致為通志所駁謂輩生

億後不能用其語名亭考舊志職官表楊億為靖安令
在紹興二十五年自別一楊億非文公也

袞繡堂在縣署內東北宋嘉泰間曹幽為邑主簿多善政後
官至禮部侍郎人思其德作此堂以美之 舊志

寒泉堂在縣南宋紹興間邑令吳秩建元季燬於兵明知縣
衡守敬改為鋪遞 舊志

採芹亭在儒學前明洪武三十年教諭徐鼎建後為水衝廢
舊志

植芳亭在法藥寺內明正德六年知府李承勛以勦賊寓此
手植栢四株於方丈前知縣萬士賢建亭美之久廢 舊志

雙溪亭在縣北毬場之東舊志久廢建置無考

磨劍池在熊仙都凝禧觀前相傳許真君磨劍於此其田化

為水灌田數百畝至今不竭舊志

劍泉在東江都香田張家邊有一巨石許真君至此馬渴卓

劍石上遂湧清泉馬蹄遺蹟猶存舊志

烏牛石在熊仙都和尚嶺石久成怪許真君劍裂為三遺跡

宛然舊志

石船在富仁都山麓長數十丈如船中有石圓如鼓相傳許

真君逐蛟至此登山四望俗呼望蛟船舊志

石魚石硯俱在寶峯寺旁泐潭上石魚如木魚形扣之有聲

石硯貯水四時清漪以手掬之隨涸隨盈舊志

響石在棠棣都雲山擊之有鐘磬聲明劉煥題其上云爾石

之精金玉爾音鏗然一拊谷應山鳴舊志

雙溪十景

南橋明月

南橋距城半里許週圍平曠流水潺湲清秋月夕遊人

臨眺輒生曠懷

繡谷飛雲

繡谷在吳憩山東時出雲氣與山掩映隱顯明滅瞬息

萬狀

鶴嶺晴嵐

鶴嶺在棠棣都相傳仙人放鶴之處深奧岑鬱地勢奇異朝光激射迥如日照香爐

龍岡晚翠

龍岡在富仁都道書載異人隱士多出入於此暮藹橫斜羣峯幕秀擬之如笑如睡尚未足狀其景

桃源春色

桃源在棠棣都二劉隱居之所花明柳暗別是一村三春挈榼來遊有流水鱖魚之樂

棠浦秋光

棠浦在熊仙都又名棠港渡鷗飛鳧浴斷岸流沙水天一色彷彿人在鏡中

謔母高峯

峯在縣北十里石霞村高不過百丈而聳然孤踞下視衆山真同培塿固宜嬰母驂鸞

曹仙古洞

洞距縣十里與謔母峯相對四山環繞隱然一小洞天高卧抱雲心空太古

雙峯霽雪

雙峯在縣西四十里冬後寒山失翠此獨嶺秀孤松積

雪初消遙望儼懸瀑布

丹井寒泉

丹井在棲霞觀之東劉懿真煉丹所遺水泉甘冽品茶者多取汲於此三峽中冷欲爭其勝

龍岡八景

龍岡烟樹 鷹島春雲 屏風疊翠 玉尺凌霄

東山石壁 古井神流 磬溪漁唱 西嶺樵歌

邱墓

一抔之土屹若嵩華重其人焉故耳舊志所載特存矜慎今亦不復增益諛墓之譏庶其免矣

宋

兵部侍郎李大東墓奉敕葬熊仙都

案通志載在靖安縣北三十里象湖嘉定十七年敕葬於此翁仲碑碣尚存鄉人稱為李府塚

贈承直郎舒茂暨配李孺人合墓在東江都明右春坊右諭德姑蘇吳寬志銘

知全州胡敦實墓在樾榔山敷文魯豈志銘

司錄參軍舒邦佐墓在盆田都華文閣直學士中奉大夫李
大異志銘

翰林學士劉起龍墓在富仁都

鄉進士陰應夢墓在白香山

隱士劉子虛墓在桃源西莊坪

節判余炎午墓在盆田地

案通志載在沙溪山

元

舒廉夫墓在桃源山吳澄志銘

處士余尹武墓在棠棣都

明

尚書李叔正墓在大梓都編修蘇伯衡志銘

蘇州知府况鍾墓在富仁都神仙山萬家尾地方乾隆十一

年奉文開明四至勤加防護計周圍貳丈東至大河南至山脚及大河西

至小塌直上軟均北至山頂

祠廟

國有秩祀已具詳諸典禮其他有功德於民為民情所推戴者別錄於此至鄉邨所報各有叢祠間或登載一二不能考其原委也

况太守祠祀明蘇州知府况鍾雍正二年知縣黃天球翔建

於儒學前其裔孫捐資董事乾隆九年署縣沈顥文又率

其裔孫遷於儒學左側為今址

懷功祠在城隍廟右祀明副使吳一貫知府李承勛以平瑪

瑙崖賊之功正德六年耆民舒模等建久廢

案趙志已云歲久祠毀居民私佃公輔查出給還佃價

祠地入官時趙公修砌磚城圍城隍廟於城內其地歸入何處無跡可尋高志圖附城下想應不遠明德難諉尚當續建原跋

遺愛祠在縣治東街舊名葉應二侯祠祀明知縣葉重光應

汝稼

應公本有專祠後圯康熙三十二年合祀於此雍正二年以其地改建忠義孝弟祠雍正三年

知縣黃天球重修改今名乾隆六年徐姓重修十五年知

縣馮渠清查勘丈

計地貳分糧存徐戶前房兩間聽其租賃完糧及修葺費東至張姓屋西至李

姓屋南至城牆及官路北至官街祠宇今存

案省府志俱作二令祠

元壇廟俗稱趙公廟在縣南門外明洪武二十八年知縣高

彥才建景泰五年知縣張羽率里人重修嘉靖二十四年

知縣趙公輔清查丈量

計地東西十三丈前橫八丈南北十三丈五尺舊志

昭靈祠在縣西門外金沙洲祀楚三閭大夫屈原附祀張晏

蕭楊諸水神俗稱晏公廟

孚澤祠在縣北門河隄上祀漢高密元侯鄧禹好時愍侯耿

弇自元以前創建元至正二十二年廟毀明初縣丞游志

道復建正統九年知縣金文英率里人修之

聖堂廟在縣西門外祀許真君及馬明王明萬曆年間建

小城隍廟在縣東門外迤北城根相傳神祀明知府李承勛

四聖祠在縣市中街務前角其巷卽以四聖得名

顯福祠原名五顯在縣市中街明洪武年間建嘉靖時知縣史載澤修之

庫神祠一在縣署大堂東俗稱東庫殿一在縣丞署左俗稱華光廟

藥王廟在縣東門外康熙三十七年知縣毛鵠建五十五年知縣李作仁重修

萬壽宮祀許真君在藥王廟右乾隆五十六年藥王廟住持僧修如募化增建

案許真君廟各邑俱稱萬壽宮蓋緣省垣鐵柱觀明嘉靖間賜額妙濟萬壽宮

文仙廟祀文蕭在縣西二十里盆田都祈雨有應

順應廟原名感古廟在縣東二里香田祀吳建昌都尉太史

慈慈拒劉表從子磐有功嘗駐兵於靖故土人祀之廟前有古井

明王廟在縣西三十里新興都距高湖橋二百步

劉公廟在縣西門外石磯頭相傳神祀蜀漢北地王諶次子

道光元年閩邑公建

寺觀

琳宮紺宇原藉仙釋而傳亦志之以彰古蹟若夫檀越布施施概不濫及蓋此非專爲伽藍作記耳

雙林寺在縣北五里繡谷山下東晉西域沙門竺曇過之愛

其山水似西天婆羅雙林間如來說法之地遂開山居焉
唐柳公權書門扁曰大中雙林禪寺

舊志

延慶寺在縣西北八十里忠夏都梁天監中建宋紹聖間僧
子忠刻華嚴像黃庭堅爲之頌云巧工能畫諸佛像十方

三界惟心造明洪武初僧道泰復興

舊志

寶峯寺初名泐潭寺在縣北四十里大梓都石門山唐貞元

四年馬祖藏塔於此因改名有權德輿碑後有選佛堂藕

潭釣磯晁旒山諸勝宋知洪州張商英有選佛堂記

舊志

案寶峯寺爲靖邑第一名刹本朝僧玉山子輯有石

門山志板漉漫多難辨識體例亦未盡合聞前本有志

不可得見今繪圖於卷首亦可畧窺一斑矣

龍門寺原名暇僧寺在縣西北八十里忠夏都唐馬祖開山

於此其地花香泉洌可以避暑故名明洪武初僧法寶重

建崇禎間僧法璽始改今名

舊志

法藥寺原名法藥院在縣東二百步唐貞元中馬祖來遊時

縣多疫於寺後鑿井置藥井中飲者無不獲愈故以此得

名宋乾道中僧巽中重建元末燬明洪武四年僧妙住復

興正統五年僧永海智超新佛像增建鐘鼓樓邑令朝賀

習儀於此知縣張伯祥額曰雙溪福地井一成額曰第一

山嘉靖中僧淨寰德旺重修崇禎間廢

國朝康熙八年僧百拙重建殿宇舊志嘉慶二十二年復新

雲陽寺在縣西九十里南源都創自唐時明嘉靖間僧惠然

重建萬曆三十七年僧迴波重修寺僧東旭別剏天壽庵

舊志

黃龍寺宋時名定明院在縣南五里許元季燬於兵明正統

甲子僧永海建邑人舒文輝有句云十里峯巒排俎豆四

時鐘鼓藉禪林舊志

案舒平叔募修定明院疏即已稱為古寺則此寺之剏

建當在宋以前

曹溪寺在縣北二十里大梓都六祖曾建茅庵於此故名明

萬曆十八年僧中庵重建

國朝順治九年僧印明建觀音殿雍正六年僧東山重修舊志

九仙寺在縣西一百里南源都明永樂九年建界奉新舊志

金沙寺在縣城西半里金沙洲明萬曆二十年僧性朗建

國朝康熙五十四年水衝圯僧若愚移建於洲中北壇側今

廢

般若寺在象湖都久廢

安聖寺在富仁都古港

佑聖寺在棠棣都久廢

長靈寺在縣北二十里熊仙都康熙十年僧宏旭建

西傳寺在縣北四十里大梓都明崇禎十一年僧道寶建

國朝雍正元年僧法純重修

俱舊志

善法院在縣東十一里東江都初名西林宋祥符二年改今額

國朝順治九年僧貞白重修

寶月院在縣北三十里象湖都初自唐時明景泰癸酉重建已廢

報身院在縣西八十里南源都初自宋時明正統間僧本然重建久廢

善業院在縣東北二十五里追里都

俱舊志

書堂庵一名雲峯寺在縣西三十里新興都唐馬祖建明正統間僧永海重修前有虎跡石後有觀音崖宋舒公平明王文成與舒柏並講學於此文成有萬花幽谷春風足孤月山牕夜氣虛之句邑人士多下榻於此正德庚午燬僧明淨復建

舊志

案此則王陽明曾至靖邑矣今其楹帖猶存

馴龍庵在縣南半里康熙十四年僧若曇建

舊志

護龍庵距縣半里明萬厯己酉僧機緣建壬戌僧月林增建觀音堂南昌舒曰敬顏曰續開蓮社

舊志今廢

太平庵在縣西五十里富仁都明萬厯間僧性朗建南有鶯

崖西有講經堂東有菩提場雲麓場崇禎十七年僧普春重興舊志今廢

古田庵在縣南十里東江都僧南山結廬於此明萬曆元年僧秀峯建

國朝康熙六年僧德球重修

青蓮庵在縣西二十里棠棣都明崇禎九年僧明虛建

躍龍庵在縣東南十里夏陂都明崇禎二年僧素白建

長坑庵一名湧泉山在縣西北六十里礫坑都明萬曆十二年僧慈義重修二十七年僧瑞雲募建茶庵俱舊志

金華庵一名箬坪庵在縣西七十里南源都明萬曆間僧天

衢建

國朝康熙三十年僧廣慈重修舊志乾隆二十五年僧徹機重修

永慶庵在縣北二十里熊仙都明崇禎七年僧隆文建

虬龍庵在縣南十里東江都明崇禎十二年僧若曇建

古靈庵在縣西六十里忠夏都

仙峯庵在縣西北六十里塘埠明隆慶二年僧惠空建

國朝康熙十六年僧穎悟重修

石霞庵在縣北二十里熊仙都

上林庵在縣西三里廂都明成化十六年僧普圓建

天福庵在縣南十八里夏陂都

國朝康熙十年僧中印建

解橋庵在縣南十里夏陂都明萬厯間僧大海建

國朝康熙十六年僧雲際重修改名福裕寺

天竺庵在縣西八十里南源都明宏治間僧檀空建

俱舊志

尋仙庵在縣西南源都龍頭坳白雲峯下

雲雷庵在縣西棠棣都明正德年間僧淨心建

香象庵在縣西南源都當歸湖

黃茅嶺庵在縣西六十里忠夏都

鳴鳳庵在縣西三十五里棠棣都桃源白水洞口洞距庵二

里許有泉最靈祈雨輒應置有田畝以資行人茶水乾隆

癸丑年庵與田俱被水衝廢後僧遷建于熊姓對門山

傳薪庵在山口黃泥坑

柏木庵在北石馬

毓秀庵在縣南石馬八里

木華車觀在縣西門外半里晉女冠劉懿真上昇處因留寶

木華車故名一名劉仙觀宋治平間改棲霞觀今仍復舊

名僧人住持

崇元觀在縣西四十里棠棣都葛仙山之西舊名甘仙觀本

甘真人故宅師事許旌陽大康元年正月六日飛昇觀久

廢宋袁陟有詩

舊志

案高志誤分崇元甘仙為二據趙志改正

原跋

登真觀在縣西二十五里盆田都晉許旌陽逐蛟過此有試
劍石遺跡

凝禧觀在縣北十里熊仙都周顯德元年建明洪武初道士
馬文元重建今僧住持

集仙觀在縣西一百餘里忠夏都永樂九年建久圯

壽華庵原名寧壽在縣北門外尼僧住持

福清庵在縣西門外壩上尼僧住持

軼事

小說方言史家不廢班孟堅所謂閭里小知者之所
及亦使綴而不忘者是也美惡兼收隱昭法戒豈徒
以資談柄耶

張保義者本邑村朝山屠兒以建炎捍寇功得官賞產甚富
乃戍志所書寶峯主僧景祥所識者寺旣焚燬張一力重
營之又置田數千畝以贍常住張藏錢不甚多至築工庫
數十所作貯積處平生享用自如閱三十年歲暮忽聞庫
丙錢唧唧有聲出戶外張持杖擊其門曰汝要去須是我
死後始得如今大驚小怪作恁麼生卽寂無影響又數年
乃死隣里咸見其庫錢晨夜飛出如蝴蝶然未幾居室百
間一蕪而空寶峯相去數十里旬日間亦煨燼不遺張氏

子孫雖存而生理不能百一矣

洪邁夷堅志

陰陽家有九良星煞之禁謂當其所值不可觸犯或誤於此方營建則災禍立至俚俗畏之特甚寶峯寺僧堂蠹敗不堪安眾長老景祥欲新之羣僧合言今年正值九良所棲無爲空取禍祥獨以爲不然曰神人一也皆欲安居烏有人不可處而神可處乎卽率眾往誦經白神請暫遷法堂候修造訖日還位踰月堂畢乃如前說復率眾誦經迎神歸故處後皆無他時紹興丙寅歲也至紹熙庚戌鄰寺大梓院議葺僧堂眾又以犯九良爲言主僧用景祥故事禱誦遷神一年僧行數輩相繼亡歿堂迄不就鄉人輕薄者

或因相傲罵詈以兩寺爲口實云

夷堅志

乾道辛卯歲江浙大旱豫章尤甚龍實之作牧命諸籍富藏穀者責認糶令自津般隨遠近赴某所每鄉擇一人爲隅官主其給納靖安羨門鄉范主者在此選張氏當糶二千斛以情語范曰以官價較市直不及三之二計吾所失蓋不勝多矣吾與君相從久宜蒙庇護盍爲具虛數以告官司他日自有以相報范喜其甘言且冀後謝諾其請爲之委曲張遂不復捐斗升門里皆知之而畏二家勢力弗敢宣泄壬辰秋大稔前事頓息范張由此愈益交歡癸巳春范以微疾卒將斂復蘇呼謂其弟曰我適入一公府殿宇

嚴峻官吏森列使我供責減壽二紀狀我自念平生無過
惡拒而不從吏云前年汝爲隅官虛申張家賑糶穀二千
石至餓死者若干人非汝罪耶我記得張家只認千石今
乃倍之隨哀祈此吏放回取照遂得暫歸當應于文書盡
寘篋中汝爲我檢索恐可藉手弟亟往取視果二千石范
卽瞑目時年三十有八踰年張亦死

夷堅志

明禮部尚書李宗頤微時遇一神人體頎而形異問何神曰
吾漢左將軍關雲長也昔仗義以扶漢鼎得侍上帝之廷
今遊下界轄人間事宗頤曰聞侯長于吟咏請以壁間畫
圖爲題可乎因聯吟得七言律一首筆削芙蓉清露外

壯小

銀河瀑布紫雲間

宗頤

仙翁策杖何年往

壯繆

漁父搖船

盡日還

宗頤

行旅載瞻彭澤岸

壯繆

釣竿長拂富春山

宗頤

只今俊彥當奇用

壯繆

天地何由知我閒

宗頤

舊志

况伯律初見邑令甫弱冠令屬以對云一扇千鬚動况應聲
曰三梳萬髮齊令異之說者謂梳與蘇同音已爲三任蘇
州之讖矣

續餘冬錄

况公爲部郎時蘇人無故競傳公守郡三年後果如所傳

本集

撫

宣德乙卯正月余泰自縣夜歸至感古廟倦而睡覺忽見空

中有榜揭余泰二字是秋果中式

舊志

靖安袁姓人能化虎爲淫爲盜久之父聞而伺其出覆盂水而斫令暈遂不能返形後有見虎前一足乃人手者曰此袁某也衆射殺之嗚呼一念之惡化爲異類書傳所載可爲猛省而況學術以求之乎

徐世溥雨神新編

靖安舒四長好拳勇閱數師矣顧自謂弗善去之金陵登某甲之門甲勇聞通國生徒甚衆居數年畧盡其技一日師徒遊大市遇樵者負薪疾過悞裂甲衣樵惶恐俯躬謝甲怒搥其面樵愠曰悞而謝焉亦足矣何遽搥我甲以已素力搥人無不仆者樵乃不仆且抗言愈怒遂拳之手未及樵甲反仆其徒皆駭然相顧莫敢近市人無不笑者樵責

讓數言徐徐負薪去舒異之潛尾出城數里得荒村茅屋一區樵者入焉舒拜於門外求爲弟子樵反顧訝曰子何爲者舒曰公適所仆者吾師也知公神勇故舍而從公請卒爲弟子樵辭曰無能徑入不出舒徘徊門外久之詢諸其鄰樵者何人也鄰人曰是嘗徙此莫知其姓名有母焉老矣日給於樵甚孝也舒遂歸且日復往伺樵旣出登堂拜其母出百金爲壽母亦詫不肯納舒具陳已意欲母語樵使卒爲弟子母許之樵歸得母命且感其意謂舒曰苟有薄長敢不以相授然請兄我毋師我舒從之樵引至屋後有石坡甚峻軌轍如繩下有磴重三四百斤使舒掇之

僅能舉樵以足蹴磴輒而上及於坡頂輾轉而下又蹴之如是十數無困色曰筋力久弛聊以此當運甓耳飲舒以藥使習之久而能焉遂教以鍊形攝氣之法周身如鐵巨挺撲之皆反躍以腹貼牆壁及屋梁能行而不墜積十餘年乃辭歸賣漿豫章城遇人謙謹若無能者或言舒蓋無敵矣聞者多不信羣不逞詣之請與角舒謝曰諸公皆壯士余何能余何能請不已乃曰雖嘗學之然甚劣竊欲博觀諸公技勇使習而進焉幸甚衆許之相與之野外各呈其能舒觀而哂曰甚善衆欲試舒舒曰若欲試我者則毆我一少年應聲毆之甫引拳忽反仆少年羞怒出鐵杵悉

力擊之舒夾持其杵作色曰太惡劇是欲死我乎乃弛衣服俛而立曰來來共攻我我不畏於是手足器械交至如雨舒屹然受之衆紛紛墜跌黥者乘虛擊其腎如擊石焉衆始懼羅拜請長其曹乞勿揚於人以敗其譽舒笑曰吾以自娛耳豈欲與諸公競短長哉幸無慮此衆益服其量由是舒名噪一城接見賓友或把臂握手當者輒痛器具入手往往破碎其力如此今死矣死時遺紫血數斗甚慘楚藥故也嘗曰吾能氣行耳樵乃能神行不可及也樵蓋秦人嘗爲盜已乃改行變姓名遁居金陵奉母以終云

譜耳食錄

樂官

新修霽峯塔記

張元奇

昔阿育始造浮圖自佛入中國而浮圖遍於天下然亦彼法自用以藏舍利耳後世形家之說盛行以浮圖尖出爲有類於文筆且謂鎮固不搖足以收攝地氣揆古人相度陰陽之理蓋亦有可信者以故都會郡縣所在皆有塔靖安山水奧區也城東外半里而遙有曰登高山岡巒明秀高不過三丈按之方位在縣治巽宮主應一邑文明而又南溪一水自西來而北而東以趨於馬草湖此山連接金城近扼其衝亦實下流之關鍵其上舊建塔五層碑碣無存莫詳叛修所自歷久甃石多迸裂頂首鐵蓋半毀草樹杈叢生殆將傾圮道

光癸未春邑人士請於本任北平張公欲重新之適奉檄修縣志因以兩事竝舉倡議勸捐定陶伐石是年冬十一月興工當拆毀時得萬厯制錢六枚意卽建於明神宗朝者與然年月究不可識矣工未竟張前令有京師之役余來承其乏督催匠作於甲申十一月落成方嚮悉仍舊址周圍擴大一丈餘尺上增二級初基用石磨治極堅潔層累而上空其中而各爲樓計用磚埴之物約十二萬頂以甃上奉藏佛一尊爲少府董君所助復得東門陳氏先世手寫金剛經一襲並藏皮焉蓋教本浮圖卽以其道治之耳諸紳以塔旣重新宜有嘉名肇錫余觀縣北雙峯霽景爲邑中最勝正與斯塔遙

相對峙因卽額以霽峯合尖以來檐牙高聳秋煙瘦影如展畫圖而凡宦游斯地及行客自會城來者十里外遙望山腰半露亭亭林表已識千家縣在其下清華間矣况居人生長是邦以時登眺其巔撫今追昔能毋有進而益上之思乎是役也與志事合修而各分其籍凡用金錢三千緡有奇同城諸君子與在局董事逐時稽察寒風暑雨不憚往返之勞而其日夕在工監視者則舒王二耆老也名氏已俱列志首茲不備書

後序

道光乙酉夏季靖安縣志刻竣邑侯
張紫村先生既為敘于前矣懋官杜
門讀禮言不敢文而在事諸君謂官
實首任編纂宜有一言垂告後來辭
不獲則請敘述志事始終以見偏隅
下邑成此書亦殊匪易而時閱三年

邑當事且經三任若與前志相類者
為可異也先是辛巳之冬江右十三
郡薦紳合詞上 臺省請修通志官
與名其末

大憲嘉允所請即頒式馳檄各郡縣
照修志底備采我北平 張侯奉令
惟謹時方議修縣塔念兩事竝舉瘠

邑艱費設法分都勸捐經歲始有端
緒癸未秋季乃開局于雙溪書院分
曹各治其事 侯以官曾令新安修
彼邑志當習熟舊章畀任總纂之役
媿謝未能也 官維自來邑乘推康武
功韓朝邑兩志為絕作其書一則七
篇一才二十餘葉耳體例之謹嚴如

此志可易言乎哉然竊聞諸家長老
曰志固通於史而修志視修史為難
以邑人而修邑志則尤難非難於筆
蓋難於削也惟持以敬慎不敗之心
求無大悖乎公是公非之正在邑言
邑毋徇同亦毋好異斯已耳若夫著
述之事義理與攷證二者均不可廢

今古人才心精一脈遞嬗無窮自有
光景墨新遙遙相待之故此吾所以
斟酌損益而因而兼創者蓋其難其
慎也吾邑文獻缺紀載者七十餘年
中間一修府志頗復有所增益而采
訪未詳所存乾隆一志版亦漫漶矣
綜其大概固已較前稱備第繁簡去

取之間不能不有待後來之訂正入局以來與同事編摩纂輯兀兀寒宵虛衷商榷凡三月初藁垂成不幸官猝遭大戚諸君亦多以事故散去遂輟業焉明年春復啟局爰命次子恭受衽服厥勞搜求校勘亦間有新得遇事每取決于前侯官於壘廬之中時

為之刪定蓋又六閱月而成書則侯已先期入

覲矣署任龍眠張大尹覆加鑒政以為是非尚不謬于大雅且于新頒格式門類省併得宜皮藁于署將待申送今春三月前侯歸自京師趣之授梓甫開雕又以督河餉北行今南昌

二尹岳陽 張公來攝篆校閱一過
督催工作用能剴劘告歲前後三遇
賢侯且同系一宗抑何異耶夫以偏
隅下邑一志之成歷歲月如是之久
宜其精詳嚴謹矣而蕪襍註漏之譏
顧有所不免自維學植不深中歲復
荒于吏事投老歸田精力日減勉膺

斯任祇增媿業惟數年來與諸君子
冰兢矢慎我見昏忘尚為梓鄉所共
諒耳後視今猶今視昔安知一
領絕特之士博學多識足以
志者則固 侯之所甚望而
幸也夫邑人舒懋官謹

一、通商口岸之開闢
 二、領事官之設置
 三、租界之劃定
 四、通商章程之擬定
 五、通商口岸之保護
 六、通商口岸之管理
 七、通商口岸之發展
 八、通商口岸之繁榮
 九、通商口岸之衰頹
 十、通商口岸之變遷